



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՍՏՎԱԾԱԿԱՆ ԵՎ ԲԱՆԱԿԱՆ ԵՐԱՐԱՐՈՒԹՅԱՆ ՄԻՋՈՑԱՆԵՐԻ ՄԱՍԻՆ
24 ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՍՏՎԱԾԱԿԱՆ ԵՎ ԲԱՆԱԿԱՆ ԵՐԱՐԱՐՈՒԹՅԱՆ ՄԻՋՈՑԱՆԵՐԻ ՄԱՍԻՆ
 ԵՎ ԲԱՆԱԿԱՆ ԵՐԱՐԱՐՈՒԹՅԱՆ ՄԻՋՈՑԱՆԵՐԻ ՄԱՍԻՆ

Մինարեթի ապամոնտաժման պաշտոնական որոշման կատարումը իրականացրել է Վրաստանի ֆինանսների նախարարության պետականությունների վարչությունը՝ այն հիմնվորմամբ, որ անհրաժեշտ է ստուգել, թե մինարեթի կառուցման ժամանակ օգտագործված մետաղը պատշաճ մաքսային ստուգում անցել է, թե ոչ:

Մինարեթի կառուցվածքները Վրաստան էին բերվել Թուրքիայից, հուլիսի 14-ին, Ճելա գյուղի անհատական ձեռներեց գրանցված մի բնակչի կողմից եւ դրվել նրա, որպես մզկիթ ծառայող մասնավոր տան բակում: Բայց օգոստոսի 20-ին Ադիգենիի մունիցիպալիտետի ղեկավարությունը որոշում էր ընդունել, որի համաձայն՝ մինարեթի տեղադրումն անօրինական է եւ տեղական իշխանությունների կողմից չարտոնված: Արդյունքում, օգոստոսի 26-ին իրավապահներն արդեն կանգնեցված մինարեթը ապամոնտաժել եւ դուրս էին բերել գյուղից: Գործընթացը ուղեկցվել է իրավապահ մարմինների ներկայացուցիչների եւ տեղի մուսուլմանների ընդհարումներով: Բախումների արդյունքում ծեծի են ենթարկվել 6, իսկ ոստիկանության բաժանմունք են տարվել 11 տեղի բնակիչներ:

Մինարեթի ապամոնտաժումը հանգեցրեց ինչպես տեղի, այնպես էլ Վրաստանի մուսուլմանների միության դժգոհության: Վրաստանի վարչապետ Բիծինա Իվանիշվիլուն հասցեագրված դիմումում, միության ղեկավար Տարիել Նակաիծեն պահանջում է պաշտպանել Վրաստանի մահմեդականների սահմանադրական իրավունքները եւ պարզել Ճելա գյուղի մինարեթի ապամոնտաժման օրինականությունը:

Մինարեթի ապամոնտաժման դեմ բողոքի ակցիաներ անցկացվեցին՝ ինչպես Ախալցխեում, այնպես էլ Բաթումիում: Օգոստոսի 27-ին մինարեթի ապամոնտաժման դեմ բողոքի ակցիա անցկացվեց նաեւ Թբիլիսիում, կառավարության գրասենյակի մոտակայքում:

Ճելա գյուղում մինարեթի ապամոնտաժման հետեւանքով սկսված զարգացումների կապակցությամբ Վրաց Ուղղափառ եկեղեցին օգոստոսի 28-ին հայտարարություն է տարածել: Հայտարարության մեջ նշվում է, որ բռնկված ընդվզումները հատուկ հրահրվել են «որոշ ուժեր»-ի կողմից, որոնց նպատակն է իրար դեմ հանել երկրի մուսուլման եւ քրիստոնյա բնակչությանը:

«Այն, ինչ հիմա կատարվում է, կրոնական թշնամանք հրահրելու փորձ է՝ որոշ չափով նման այն գործողություններին, որ կատարվել են Նիզվադիանի, Ծինծղարո եւ Սամթաղարո գյուղերում», - նշված է հաղորդագրությունում:

Նշենք, որ անցյալ տարվա նոյեմբերից մուսուլմաններով եւ քրիստոնյաներով խառը բնակեցված մի քանի գյուղերում քրիստոնյաների եւ մուսուլմանների միջեւ արդեն տեղի էին ունեցել ընդհարումներ: Թեպետ ի տարբերություն այդ գյուղերի՝ Ճելայի մուսուլմաններն ու քրիստոնյաները հակասություններ չեն ունեցել:

Վրաց եկեղեցին նաեւ դիմել է Վրաստանի մուսուլման հոգեւոր առաջնորդներին՝ խնդրելով «չօժանդակել եւ պայքարել այդ սադրիչ գործունեության դեմ՝ ինչպես Ադիգենիում, այնպես էլ Վրաստանի մյուս շրջաններում»:

Վրաց Ուղղափառ եկեղեցու պատրիարքարանի հայտարարության մեջ նշված է, մինարեթը պետք է վերադարձվի Ադիգենիի Ճելա գյուղ, սակայն այն չպետք է տեղադրվի, մինչեւ համապատասխան օրենք չմշակվի եւ չքննարկվի հարցը Վրաց Ուղղափառ եկեղեցու հետ: Տեղի ունեցածը դատապարտել է նաեւ Վրաստանի նախագահ Միխեիլ Սաակաշվիլին, այդ քայլը որակելով «վրաց մուսուլմանների դեմ կատարված ապօրինություն»:

Նախագահը կառավարությանը երկխոսություն սկսելու կոչ է արել. «Վրաստանում ապրում են հարյուր հազարավոր մուսուլմաններ, իսկ արտերկրում՝ միլիոնավոր մուսուլման վրացիներ, ուստի չի կարելի վիրավորել նրանց կրոնական զգացմունքները, դա անթույլատրելի է: Այդ քայլի համար պատասխանատուները պետք է օրենքի առաջ պատասխան տան», - հավելել է Վրաստանի նախագահը:

Ի պատասխան մինարեթի ապամոնտաժման դեմ անցկացվող ակցիաների, Ախալցխից Ադիգենիի շրջան տանող ճանապարհին օգոստոսի 29-ին, տեղի է ունեցել հանրահավաք ընդդեմ մինարեթի վերադարձման եւ վերականգնման: Հանրահավաքի մասնակիցները ուղղափառ եկեղեցու դավանորդ վրացիներն էին, որոնց կարծիքով անթույլատրելի է, որ մինարեթը վերականգնվի: Ցույցի մասնակիցների հետ Վրաց Ուղղափառ եկեղեցուն բարձրաստիճան հոգեւորականների հանդիպումից հետո, ակցիայի մասնակիցները ցրվել են, սպասելով երկրի իշխանությունների որոշմանը:

Ավելացնենք, որ երեկ, օգոստոսի 30-ին մինարեթը վերադարձվեց Ճելա գյուղ, կնքվել ու պահվել է, մինչեւ իշխանությունների կողմից դրա տեղադրման կամ չտեղադրման մասին որոշման ընդունումը: